

## Санъат адабий-назарий муаммо сифатида

### (XX аср бошлари ўзбек адабиётшунослиги)

Санъатнинг пайдо бўлиши, турлари ва моҳияти фалсафа, эстетика, психология ҳамда адабиётшуносликнинг азалий муаммоларидан бўлиб келган. Жумладан, қадим аждодларимизнинг бу борадаги фикру қарашлари ҳам ўз ўрни ва салмоғига эга. Бироқ, шуни алоҳида таъкидлаш жоизки, ўзбек адабиётшунослиги тарихида санъатни назарий жиҳатдан ўрганиш, фақат XX аср бошларига келиб муайян тизимга тушди. Албатта, бунинг ўзига хос ижтимоий-тариҳий, маънавий-маданий, интеллектуал-психологик омиллари мавжуд. Айни шу омиллар замонавий ўзбек адабиётшунослигининг ilk босқичида юзага келган назарий қарашлар табиатни белгилайди. XX аср бошлари ўзбек адабиётшунослигида санъатни назарий талқин этиш принциплари хилма-хил баъзи ҳолларда ўзаро зид келади. Бунда соф назарий талқинларни ҳам, миллий ғоя ва жадидча қарашларга йўғрилган фикрларни ҳам, шунингдек, марксча нуқтаи назарнинг таъсирини ҳам кузатишимииз мумкин. Ҳуидида ушбу фикрларимизни А. Фитрат, А. Авлоний, А. Саъдий, О. Ҳошим каби олиму адибларнинг айрим тадқиқотлари мисолида исбот этишга уринамиз.

Санъат назариясига доир фикрлар Фитратнинг, асосан иккита ишида ўз аксини топган. Буларнинг бири «Адабиёт қоидалари» дарслиги, иккинчиси «Санъатнинг маншай» (Санъатнинг келиб чиқиши) ҳақидаги мақолосидир.<sup>1</sup> Адабиёт қоидалари»да санъат тушунчасига таъриф берилар экан, асосий эътибор ушбу сўзнинг соф луғавий маъносига қаратилади. Бу ҳақда: «Санъат сўзи луғатда хунар демакдирким, бир нарсани яхши ишлаб чиқаришдан иборатдир», деб ёзилади китобда. Аслида «санъат» сўзи туркийга араб тилидан кириб келган бўлиб, луғавий маъноси «ясалган», «ишланган», «ишлаб чиқарилган»дир.<sup>2</sup> Бироқ вақт ўтиши билан бу сўз маъно жиҳатдан кенгайди ва бугунги кунда ишлаб чиқарилган нарсанинг энг олий намунаси, унинг такрорланмас эканини англатади.

---

<sup>1</sup>Харанг: Фитрат А. Адабиёт қоидалари.- Т.: Ўқитувчи, 1995; Фитрат А. «Санъатнинг маншай»<sup>ff</sup> Маориф ва ўқитгучи, 1927, 5-сон.

<sup>2</sup>Харанг: Арабско-русский словарь. Том 1.- Т.: Камалак, 1994.

Демак, санъат сўзи инсон тафаккури ва ҳиссиётининг махсули ўлароқ дунёга келган, кишиларга эстетик завқ беришга ярайдиган нарсани билдиради.

Шу маънода Фитратнинг қуидаги фикрлари эътиборга лойиқдир: «Бир киши бир нарсани ўзига касб қилиб олиб, яхши ишлаб чиқаратурғон бўлса, шу иш унинг санъати бўладир». Олим санъатнинг эстетик қийматга эга бўлган шаклини «гўзал санъат» деб атайди. «Яхшилаб чалинғон «Ирок» куйининг яхшилиғига... «гўзал санъат» дейиладир»,

деб ёзади бу ҳақда. Санъат сўзининг маъно жиҳатдан нозик товланишларини эса қуидагича тушунтиради: «Яхшилаб чалинғон «Ироқ» куйининг тилаги билан, яхшилаб ясалган бир танбурнинг орасида каттакон айирма бордир. Бошқача айтганда, «Ироқ» куйининг яхшилиғи билан танбурнинг яхшилиғи бир эмасdir. Тобоқ танбурнинг яхшиликлари буларнинг ишқа ярағонликларидир. «Ироқ» куйининг яхшилиғи эса кишига маънавий таъсир этмак, унинг миясини тўлқунлантирмакдир» (Таъкид бизники – У. Ж.).<sup>3,4</sup> Кўринадики, Фитрат санъатнинг эстетик қийматини белгилашда ўзига хос шарқона усулни қўллаган.

Яъни санъатнинг назарий талқинида бу сўзниңг этиологияси, маъно жиҳатдан кенгайиш жараёнларига, истилоҳ сифатида бажарадиган функциясига асосланган.

Олим «гўзал санъат»нинг моҳиятини ижтимоий муҳитда бажарадиган вазифаси (функцияси – «ўзгаларда ҳам шу тўлқинни яратмоқ»)дан келиб чиқиб тушунтиради. Бу фикр марказида Фитратнинг ижтимоий-сиёсий қарашлари мужассам эди. Зоро, жадид эстетикасининг асосида «ўзгаларга таъсир этиш» (миллатни уйғотиш) ётиши бугун ҳеч кимга сир эмас. Бироқ давр мураккаблашиб борар, жорий сиёсат эркин фикрни талаб этар, ўз измига солишга уринар эди. Шу сабаб Фитратнинг бундай оригинал талқинлари муносиб баҳоланмади. Аксинча ўринсиз танқидларга учради.

Фитратнинг санъат назариясига доир фикрлари «Санъатнинг маншай» мақоласида давом эттирилди. Олим «Адабиёт қоидалари» китобида санъат тушанчасининг истилоҳий маъноларини илмий изоҳлаган, санъат турларини тасниф этган бўлса, ушбу мақоласида санъатнинг келиб чиқиши ҳақидаги мавжуд қарашларни ташхису таҳлил қиласи. Мақолани баҳс-мунозаралар асосида қуради. «Инсонлик тарихида бу қадар эски ўрин тутқон санъатнинг пайдо бўлиши қандайдир? Бунга сабаб нима эмиш?» деган савол қўяди ва саволнинг илмий ечимини топишга уринади.<sup>5</sup>

Санъатнинг келиб чиқиши масаласини ўрганиш, Фитрат мақоласи ёзилган даврдан анча илгари бошлангани маълум. Шуни ҳисобга олган Фитрат, ўзигача мавжуд бўлган назарий талқинлар устида мухтасар тўхталиб ўтади. Уларнинг баъзилари билан илмий мунозара гиришади. Мақола мазмунидан олимни баҳсга чорлаган қарашларнинг бири анимистик тушунчаларга асосланувчи Спинсер назарияси, иккинчиси психологик мактаб томонидан олдинга сурилган фикрлар, деган хуносага келиш мумкин.<sup>6</sup>

<sup>3,4</sup> Фитрат А.Адабиёт =оидалари.-Т.:Ы=итувчи,20-бет.

<sup>5</sup> Фитрат А.Санъатнинг маншай || Маориф ва ы=ит\учи,1927,5-сон,37-бет.

<sup>6</sup> Маълумки, психологик мактабга немис олими В.Вундт асос соглан былиб, мазкур мактаб мифлар, туш кириш ва галлюцинация каби руҳий ўзлаларни негизида поэтик тащлилнинг янги методини ишлаб чи==ан. Бу метод рус адабиётшунослигида XIX асрнинг иккинчи ярмиларида кириб келган ва шыролар сиёсати =атъий та==и==ланган 20-йилларнинг ўрталаригача амалда былган. Фитратнинг 20-йилларда Москвада ишлагани, етакчи рус адабиётшунослари билан щамкорлик =илгани эътиборга олинса, масала ойдинлашади.

Манбаларнинг гувоҳлик беришича, психологияк мактабнинг вориси ўлароқ майдонга келган З. Фрейднинг психоаналитик назарияси 20-йилларнинг ўрталарида қадар рус адабиётшуносларининг эътибор марказида бўлган. Бу ҳолат фрейдизмни марксча назария билан мувофиқлаштиришга уринишларда кўринган. Жорий сиёсат эса психологик мактаб каби фрейдизмни ҳам зарарли, деб топган. Оқибатда бундай назарияларни марксизмга суюниб танқид этиш, инкор қилиш бошланган.<sup>7</sup> Ҳизиги шундаки, ушбу ҳолат ўзининг зиддиятлари билан Фитрат мақоласида ҳам акс этган.

Фитрат санъатнинг келиб чиқишини мифлар ва туш кўришга боғлашни инкор этиб, шундай ёзади: «...буларнинг (санъат турлари ҳақида гап кетяпти – У. Ж.) туғилишларини динга, маънавиятга эмас, моддий ҳаётга боғлаш мувофиқдир». Ва барча санъат турларининг келиб чиқишини материалистик нуқтаи назардан изоҳлашга уринади. Хусусан, мусиқанинг пайдо бўлишини меҳнат ва рақс чоғида рўй берадиган ритмли ҳаракатга, сўз санъатини эса шу ритмли ҳаракатнинг инсон товуши орқали бўлган такрорий ифодасига боғлайди. Бу ҳақда: «...иш ҳамда рақс чоғларидаги оз-кўп оҳангли товушлар, сайҳалар, қичкиришлар ўрнида қисқа-қисқа жумлалар, бу кунги истилоҳ билан айтганда, қисқа-қисқа халқ ашулалари майдонга келган», деб ёзади.

Меъморлик, ҳайкалтарошлиқ ва рассомлик санъатларининг маншани ҳам: «...ҳали инсонларнинг диний туйғуларидан узоқ яшағон даврлардаги» моддий эҳтиёжлари асосида тушуниради.<sup>8</sup> Аммо ўзи санъат турларининг бошланғичи деб хисоблаган – рақс санъатининг пайдо бўлишини инсон онг ости фаолиятига хос ғайришуурый ҳолатлар билан («беихтиёр сакраб ўйнаш» - Фитрат) асослар экан, психологик мактаб, хусусан фрейдизм олдинга сурган назарий фикрларни тасдиқлайди. Ўзи суянган материалистик назарияни эса беихтиёр инкор этади.

Демак, Фитратнинг санъатга доир илк назарий қарашлари лугавий-этимологик, аргументацион-таснифий характерда ва маълум даражада жадидча ғоялари билан ҳамоҳанг бўлган.

«Адабиёт қоидаларидаги»даги шундай фикрлари туфайли жиддий танқидга учраган Фитрат кейинги («Санъатнинг маншай») ишида материалистик методологияга асосланишга уринган. Лекин унга хос шоирона табиат, жадидча дунёқарашиб ва Москвада ишлаш жараёнида шаклланган янгича илмий нуқтаи назарлар ўзаро қўшилиб, асосий масалада ғайриихтиёрий зиддият юз беришига сабаб бўлган.

Фитрат замондошларидан А. Авлоний ҳам санъатнинг келиб чиқиши ҳақида муҳтасар бир мақола ёзган. Ушбу мақоласида «қабила, уруғчилик даврида ғорларда яшаган»

<sup>7</sup> Ҳаранг: Фрейд З. Психология безсознательного.- М.: Просвещение, 1989, с. 3-4-9.

<sup>8</sup> Фитрат А. Санъатнинг маншай \| Маориф ва ы=ит\учи, 1927, 1-сон, 41-бет.

одамларнинг кўрган нарсалари шаклини тошларга ўйиб ишлашга, турли ёввойи ҳайвонлар расмини чизишга интилишлари ҳайкалтарошлиқ ва рассомлик санъатини утғидирган, деган фикрни олдинга суради. Сўз санъатининг маншани эса хилма-хил табиий овозларга (кушларнинг сайраши, шамолнинг увиллаши каби) тақлиддан келиб чиккан деб тушунтиради.<sup>9</sup> Бу ўринда материалистик назариянинг содда талқини билан тилнинг пайдо бўлиши хақидаги товушга тақлид назариясининг синтезини кузатамиз. Авлонийнинг юқоридаги фикрлари баъзи жиҳатлари билан антик давр файласуфи Демокрит қарашларига монанд келади. Негаки, Демокрит ҳам санъатнинг пайдо бўлишини турли паррандалар, ҳайвонларнинг ҳаракат ва товушларига инсоннинг тақлид қилиши билан боғлаган.<sup>10</sup>

Кўринадики, Авлоний санъатни назарий талқин этишда Фитрат сингари жаҳон эстетик тафаккурида ўзигача мавжуд бўлган қарашларга асосланган. Ўз фикрларини мантиқий далиллашга ҳаракат қилган.

А. Саъдий санъатнинг моҳияти хусусида шундай ёзади: «Гўзал санъат оҳанглик сўзлар, ҳаракат ва қилиқлар, товушлар, чизик ва ранглар, шакллар орқали бир куч ҳаяжоннинг ташқарига чиқарилишидир». Санъатнинг эстетик таъсири ҳамда вазифасини қуидагича талқин этади: «...санъат асари юракларда ажиб бир тўлқин, бир ажиб лаззат, таъмли бир таъсир туғдирса, мияда ҳам қўзғолиш ясаса, бу асар ҳақиқий бир санъат асари бўлиб саналмоққа тамом ҳақли бўладир».<sup>11</sup> Олим ушбу жумлаларда санъатнинг турлари ва уларни юзага келтирувчи манбаларни, санъат ҳодисаларининг содир бўлиш жараёнларини, санъатнинг эстетик функцияси ва моҳияти тўғрисидаги фикрларни жам этган. Бундай талқин Фитратнинг «Адабиёт қоидалари»да билдирган фикрлари билан жуда яқин келади. Аммо бу олимлардан бирининг тақлида ёхуд тақрори эмас, балки айнан фикрий яқинликдир.

Бундай фикрий яқинликнинг сабаби бизнингча , ҳар икки олмнинг шарқона «илми бадиъ» руҳида тарбия топғанлардандир. Таассуфки А. Саъдий бошқа бир тадқиқотида санъатни: «...ижтимоий муҳит, сиёсий ва иқтисодий турмуш ... ўзаро доимий курашда бўлган фикрлар, манфаатларнинг» кураш майдони сифатида талқин эатди. Бу билан санъатнинг эстетик моҳиятига эмас, кўпроқ синфий моҳиятига урғу беради. Маълум маънода, олдинги холисона фикрларига зид йўлдан боради.<sup>12</sup>

Хуллас, А. Саъдий «гўзал санъат» моҳиятини тўғри талқин этди. Бироқ унинг вазифасини белгилашда муқим позицияда тура олмади. Шу сабаб олимнинг бу борадаги фикрлари икки ёқлама моҳият касб этди. Яъни у биринчи таърифда шарқона «илми

<sup>9</sup> Авлоний А. Санойиъ нафиса // Ин=илоб, 1992, 1-сон, 41-бет.

<sup>10</sup> Осянников М. Ф. Эстетика: в прошлом, настоящем и будущем. – М.: Просвещение, 1988, С. 15.

<sup>11</sup> Саъдий А. Гызал санъат дунёсида\\Ин=илоб, 1922, 2-сон, 41-бет.

<sup>12</sup> Саъдий А. Йизбек ёш шоирлари // Туркистон, 1923, 10 декабрь.

бадиъ»га асосланган бўлса, кўриб ўтганимиз, иккинчи таърифида марксча қарашлар таъсирига берилди.

Фитрат, Авлоний ва Саъдийлардан фарқли ўлароқ О. Ҳошим қатъий суратда санъатни хукмрон мафкурунинг тарғибот воситаси деб билган. Бундай тушунча унинг адабиёт ва санъатга нисбатан қарашларини белгилаган. «Эски маданий меросда, - деб ёзади олим, кўб нарса феодализм, капитализм фикрига боб қилингон, бу жамиятда ҳукм сурган сифларнинг рухи киритилган». О. Ҳошимнинг бундай қарашлари, айниқса, бадиий услугуб таърифида яққолроқ кўринган: «Ҳар бир услугунинг умумий характери, ҳар вақт маълум даврнинг ижтимоий ва руҳий хусусиятлари билан белгиланади. Бир адабий услугуб асосий ғояси эътибори билан, маълум тарихий даврдаги жамиятнинг ижтимоий рух-турмушининг маҳсус адабий таъбиридир»<sup>13</sup>. Ушбу фикрлар эстетик воқеликка марксча талқин беришнинг айни ўзи эди. Лекин 20-йиллар ўзбек пролетар шоирларининг футуризмни вульгар талқин этишга биринчилардан бўлиб ўз эътирозини билдирган олим ҳам О. Ҳошим эди. Шу маънода олим футурист шоир – Олтой ижодини «пролетариат учун вақтинча бир адабиёт», деб баҳолаганда тўла ҳақ бўлган.

Демак, О. Ҳошим санъатнинг моҳиятини белгилашда марксча методологияга асосланган. Муайян даражада ушбу йўлнинг назарий тарғиботчиси вазифасини бажарган. Санъатни, адабиётни нозик ҳис қила олгани сабаб, пролетариат адабиётини фақат мафкура хизматчиси (яъни бадииятдан йироқ бир адабиёт) бўлишини ҳам инкор этган.

Умуман, 20-йиллар ўзбек адабиётшунослигида санъатни назарий талқин этиш принциплари муайян тизимга тушган. Бу ҳолат санъат турларини илмий тасниф этишда, санъатнинг маншай, моҳияти ҳамда эстетик функциясини белгилашга уринишларда яққол кўринади. Тадқиқ этилагн ишларнинг барчасида мумтоз Шарқ ва замонавий ғарб эстетик тафаккурининг синтезини кузатамиз. Шу билан бирга мазкур ишларда материалистик дунёқараш ва марксча назариянинг таъсири ҳам сезилади. Бироқ, ҳар қандай ички зидликлар, бирёқлама талқинларни ўзида мужассам этганидан қатъи назар, ушбу тадқиқотларнинг XX аср ўзбек эстетик тафаккури тадрижида ўзига хос ўрни бор.

2000 й.

---

<sup>13</sup> Щошим О. Сызбоши / Ўзбек адабиёти намуналари, - С – Т.: Йизнашр, 1928, V-VII-бет.

